

Filippiyoñ

Salām

¹ Yih khat Masīh Īsā ke ghulāmoñ Paulus aur Tīmuthiyus kī taraf se hai.

Main Filippī meñ maujūd un tamām logoñ ko likh rahā hūñ jinheñ Allāh ne Masīh Īsā ke zariye maḵsūs-o-muqaddas kiyā hai. Main un ke buzurgoñ aur kḥādimoñ ko bhī likh rahā hūñ.

² Kḥudā hamārā Bāp aur Kḥudāwand Īsā Masīh āp ko fazl aur salāmatī atā karen.

Jamāt ke lie Shukr-o-Duā

³ Jab bhī main āp ko yād kartā hūñ to apne Kḥudā kā shukr kartā hūñ. ⁴ Āp ke lie tamām duāoñ meñ main hameshā kḥushī se duā kartā hūñ, ⁵ is lie ki āp pahle dīn se le kar āj tak Allāh kī kḥushkḥabrī phailāne meñ mere sharīk rahe haiñ. ⁶ Aur mujhe yaqīn hai ki Allāh jis ne āp meñ yih achchhā kām shurū kiyā hai ise us dīn takmīl tak pahuñchāegā jab Masīh Īsā wāpas āegā. ⁷ Aur munāsib hai ki āp sab ke bāre meñ merā yihī kḥayāl ho, kyoñki āp mujhe azīz rakhte haiñ. Hāñ, jab mujhe jel meñ dālā gayā yā main Allāh kī kḥushkḥabrī kā difā yā us kī tasdīq kar rahā thā to āp bhī mere is kḥās fazl meñ sharīk hue. ⁸ Allāh merā gawāh hai ki main kitnī shiddat se āp sab kā ārzūmand hūñ. Hāñ, main Masīh kī-sī dilī shafqat ke sāth āp kā kḥāhishmand hūñ.

⁹ Aur merī duā hai ki āp kī muhabbat meñ ilm-o-irfān aur har tarah kī ruhānī basīrat kā yahān tak izāfā ho jāe ki wuh barḥtī barḥtī dil se chhalak uṭhe. ¹⁰ Kyoñki yih zarūrī hai tāki āp wuh bāteñ qabūl kareñ jo buniyādī ahmiyat kī hāmīl haiñ aur āp Masīh kī āmad tak belaus aur be'ilzām zindagī guzāreñ. ¹¹ Aur yoñ āp us rāstbāzī ke phal se bhare raheñge jo āp ko Īsā Masīh ke wasīle se hāsil hotī hai. Phir āp apnī zindagī se Allāh ko jalāl deñge aur us kī tamjīd kareñge.

Har Ek ko Mālūm Ho Jāe Ki Masīh Kaun Hai

¹² Bhāiyo, main chāhtā hūn ki yih bāt āp ke ilm meñ ho ki jo kuchh bhī mujh par guzarā hai wuh haqīqat meñ Allāh kī ḡhushḡhabrī ke phailāo kā bāis ban gayā hai. ¹³ Kyoñki Praiṭoriyum * ke tamām afrād aur bāqī sab ko mālūm ho gayā hai ki main Masīh kī ḡhātir qaidī hūn. ¹⁴ Aur mere qaid meñ hone kī wajah se ḡhudāwand meñ zyādātar bhāiyoñ kā etamād itnā baḡh gayā hai ki wuh mazīd dilerī ke sāth bilāḡhauf Allāh kā kalām sunāte haiñ.

¹⁵ Beshak bāz to hasad aur muḡhālafat ke bāis Masīh kī munādī kar rahe haiñ, lekin bāqiyōñ kī nīyat achchhī hai, ¹⁶ kyoñki wuh jānte haiñ ki main Allāh kī ḡhushḡhabrī ke difā kī wajah se yahān paḡā hūn. Is lie wuh muhabbat kī rūh meñ tablīḡh karte haiñ. ¹⁷ Is ke muḡābale meñ dūsre ḡhulūsdilī se Masīh ke bāre meñ paighām nahīn sunāte balki ḡhudḡharzī se. Yih samajhte

* **1:13** Gawarnar kā sarkārī mahal Praiṭoriyum kahlātā thā. Yahān is kā matlab shāhnshāh ke pahredāroñ ke kwārṭar bhī ho saktā hai.

haiñ ki ham is tarah Paulus kī giriftārī ko mazīd taklifdeh banā sakte haiñ.

¹⁸ Lekin is se kyā farq paṛtā hai! Aham bāt to yih hai ki Masīh kī munādī har tarah se kī jā rahī hai, kḥāh munād kī nīyat purkḥulūs ho yā na. Aur is wajah se maiñ kḥush hūñ. Aur kḥush rahūngā bhī, ¹⁹ kyoñki maiñ jāntā hūñ ki yih mere lie rihāī kā bāis banegā, is lie ki āp mere lie duā kar rahe haiñ aur Īsā Masīh kā Rūh merī himāyat kar rahā hai. ²⁰ Hāñ, yih merī pūrī tawaqgo aur ummīd hai. Maiñ yih bhī jāntā hūñ ki mujhe kisī bhī bāt meñ sharmindā nahīñ kiyā jāegā balki jaisā māzī meñ hameshā huā ab bhī mujhe baṛī dilerī se Masīh ko jalāl dene kā fazl milegā, kḥāh maiñ zindā rahūñ yā mar jāūñ. ²¹ Kyoñki mere lie Masīh zindagī hai aur maut nafā kā bāis. ²² Agar maiñ zindā rahūñ to is kā fāydā yih hogā ki maiñ mehnat karke mazīd phal lā sakūngā. Chunānche maiñ nahīñ kah saktā ki kyā behtar hai. ²³ Maiñ baṛī kash-ma-kash meñ rahtā hūñ. Ek taraf maiñ kūch karke Masīh ke pās hone kī ārzū rakhtā hūñ, kyoñki yih mere lie sab se behtar hotā. ²⁴ Lekin dūsri taraf zyādā zarūrī yih hai ki maiñ āp kī kḥātir zindā rahūñ. ²⁵ Aur chūnki mujhe is zarūrat kā yaqīn hai, is lie maiñ jāntā hūñ ki maiñ zindā rah kar dubārā āp sab ke sāth rahūngā tāki āp taraqqī kareñ aur imān meñ kḥush raheñ. ²⁶ Hāñ, mere āp ke pās wāpas āne se āp mere sabab se Masīh Īsā par had se zyādā faḥhr kareñge.

²⁷ Lekin āp har sūrat meñ Masīh kī kḥushkḥabrī aur āsmān ke shahriyoñ ke lāyq zindagī guzāreñ. Phir kḥāh maiñ ā kar āp

ko dekhūn, ḡhāh ḡhairmaujūdaḡī meñ āp ke bāre meñ sunūn, mujhe mālūm hogā ki āp ek Rūh meñ ḡāym haiñ, āp mil kar yakdilī se us imān ke lie jāñfishānī kar rahe haiñ jo Allāh kī ḡhushḡhabrī se paidā huā hai, ²⁸ aur āp kisī sūrat meñ apne muḡhālifoñ se dahshat nahīn khāte. Yih un ke lie ek nishān hogā ki wuh halāk ho jāenge jabki āp ko najāt hāsil hogī, aur wuh bhī Allāh se. ²⁹ Kyoñki āp ko na sirf Masih par imān lāne kā fazl hāsil huā hai balki us kī ḡhātir dukh uṡhāne kā bhī. ³⁰ Āp bhī us muḡābale meñ jāñfishānī kar rahe haiñ jis meñ āp ne mujhe dekhā hai aur jis ke bāre meñ āp ne ab sun liyā hai ki maiñ ab tak us meñ masrūf hūñ.

2

Yagāngat kī Zarūrat

¹ Kyā āp ke darmiyān Masih meñ haoslā-afzāi, muhabbat kī tasallī, Rūhul-quds kī rifāqat, nar-mdilī aur rahmat pāi jāti hai? ² Agar aisā hai to merī ḡhushī is meñ pūrī karen ki āp ek jaisī soch rakheñ aur ek jaisī muhabbat rakheñ, ek jān aur ek zahan ho jāen. ³ ḡhudḡharz na hoñ, na bātil izzat ke pichhe paṛen balki farotanī se dūsroñ ko apne se behtar samjheñ. ⁴ Har ek na sirf apnā fāydā soche balki dūsroñ kā bhī.

Masih kī Rāh-e-Salīb

⁵ Wuhī soch rakheñ jo Masih Īsā kī bhī thī.

⁶ Wuh jo Allāh kī sūrat par thā nahīn samajhtā thā ki merā Allāh ke barābar honā

koī aisī chīz hai
jis ke sāth zabardastī chimṭe rahne kī zarūrat
hai.

⁷ Nahīn, us ne apne āp ko is se mahrūm karke
ghulām kī sūrat apnāī
aur insānoñ kī mānind ban gayā.
Shakl-o-sūrat meñ wuh insān pāyā gayā.

⁸ Us ne apne āp ko past kar diyā
aur maut tak tābe rahā,
balkī salībī maut tak.

⁹ Is lie Allāh ne use sab se ālā maqām par
sarfarāz kar diyā

aur use wuh nām baḡhshā jo har nām se ālā
hai,

¹⁰ tāki Īsā ke is nām ke sāmne har ghuṭnā
jhuke,

ḡhāh wuh ghuṭnā āsmān par, zamīn par yā is
ke nīche ho,

¹¹ aur har zabān taslīm kare ki Īsā Masīh
Ḳhudāwand hai.

Yoñ Ḳhudā Bāp ko jalāl diyā jāegā.

Ruhānī Taraqqī kā Rāz

¹² Mere azīzo, jab main āp ke pās thā
to āp hameshā farmānbardār rahe. Ab jab
main ḡhairhāzir hūn to is kī kahīn zyādā
zarūrat hai. Chunānche darte aur kānpte hue
jāñfishānī karte raheñ tāki āp kī najāt takmīl
tak pahuñche. ¹³ Kyonki Ḳhudā hī āp meñ wuh
kuchh karne kī ḡhāhish paidā kartā hai jo use
pasand hai, aur wuhī āp ko yih pūrā karne kī
tāqat detā hai.

¹⁴ Sab kuchh burbuṛāe aur bahs-mubāhasā
kie baḡhair kareñ ¹⁵ tāki āp be'ilzām aur pāk

ho kar Allāh ke bedāgh farzand sābit ho jāēn, aise log jo ek ṭerhī aur ulṭī nasl ke darmiyān hī āsmān ke sitāron kī tarah chamakte-damakte ¹⁶ aur zindagī kā kalām thāme rakhte haiñ. Phir main Masīh kī āmad ke din fakhr kar sakūngā ki na main rāygāñ daurā, na befāydā jidd-o-jahd kī.

¹⁷ Dekheñ, jo k̄hidmat āp īmān se saranjām de rahe haiñ wuh ek aisī qurbānī hai jo Allāh ko pasand hai. K̄hudā kare ki jo dukh main uṭhā rahā hūñ wuh mai kī us nazar kī mānind ho jo Baitul-muqaddas meñ qurbānī par unḍelī jāti hai. Agar merī nazar wāqai āp kī qurbānī yon mukammal kare to main k̄hush hūñ aur āp ke sāth k̄hushī manātā hūñ. ¹⁸ Āp bhī isī wajah se k̄hush hon aur mere sāth k̄hushī manāēñ.

Tīmuthiyus aur Ipafruditus ko Filippiyon ke pās Bhejā Jāegā

¹⁹ Mujhe ummīd hai ki agar K̄hudāwand Īsā ne chāhā to main jald hī Tīmuthiyus ko āp ke pās bhej dūngā tāki āp ke bāre meñ k̄habar pā kar merā hauslā bhī barh jāe. ²⁰ Kyonki mere pās koī aur nahīñ jis kī soch bilkul merī jaisī hai aur jo itnī k̄hulūdilī se āp kī fikr kare. ²¹ Dūsre sab apne mafād kī talāsh meñ rahte haiñ aur wuh kuchh nazarandāz karte haiñ jo Īsā Masīh kā kām barhātā hai. ²² Lekin āp ko to mālūm hai ki Tīmuthiyus qābil-e-etamād sābit huā, ki us ne merā beṭā ban kar mere sāth Allāh kī k̄hushk̄habrī phailāne kī k̄hidmat saranjām dī. ²³ Chunāñche ummīd hai ki jyon hī mujhe patā chale ki merā kyā banegā main use āp ke pās

bhej dūngā. ²⁴ Aur merā Ḳhudāwand meñ īmān hai ki main bhī jald hī āp ke pās āūngā.

²⁵ Lekin main ne zarūrī samjhā ki itne meñ Ipafruditus ko āp ke pās wāpas bhej dūn jise āp ne qāsīd ke taur par merī zarūriyāt pūrī karne ke lie mere pās bhej diyā thā. Wuh merā sachchā bhāī, hamḱhidmat aur sāthī sipāhī sābit huā.

²⁶ Main use is lie bhej rahā hūn kyonki wuh āp sab kā nihāyat ārzūmand hai aur is lie bechain hai ki āp ko us ke bīmār hone kī ḱhabar mil gāī thī. ²⁷ Aur wuh thā bhī bīmār balki marne ko thā. Lekin Allāh ne us par rahm kiyā, aur na sirf us par balki mujh par bhī tāki mere dukh meñ izāfā na ho jāe. ²⁸ Is lie main use aur jaldī se āp ke pās bhejūngā tāki āp use dekh kar ḱhush ho jāeñ aur merī pareshānī bhī dūr ho jāe. ²⁹ Chunāñche Ḳhudāwand meñ baṛī ḱhushī se us kā istiḱbāl karen. Us jaise logon kī izzat karen, ³⁰ kyonki wuh Masīh ke kām ke bāis marne kī naubat tak pahuñch gayā thā. Us ne apnī jān ḱhatre meñ ḱāl dī tāki āp kī jagah merī wuh ḱhidmat kare jo āp na kar sake.

3

Allāh meñ Ḳhushī

¹ Mere bhāiyo, jo kuchh bhī ho, Ḳhudāwand meñ ḱhush raheñ. Main āp ko yih bāt batāte rahne se kabhī thaktā nahīn, kyonki aisā karne se āp mahfūz rahte haiñ.

Yahūdiyoñ se Ḳhabardār

² Kutton se ḱhabardār! Un sharīr mazdūron se hoshyār rahnā jo jism kī kāñṭ-chhāñṭ yānī

ḡhatnā karwāte haiñ. ³ Kyoñki ham hī haqīqī ḡhatnā ke pairokār haiñ, ham hī haiñ jo Allāh ke Rūh meñ parastish karte, Masīh Īsā par faḡhr karte aur insānī ḡhūbiyoñ par bharosā nahīñ karte.

Paulus kī Shaḡhsī Gawāhī

⁴ Bāt yih nahīñ ki merā apnī insānī ḡhūbiyoñ par bharosā karne kā koī jawāz na hotā. Jab dūsre apnī insānī ḡhūbiyoñ par faḡhr karte haiñ to maiñ un kī nisbat zyādā kar saktā hūñ. ⁵ Merā ḡhatnā huā jab maiñ abhī āḡh din kā bachchā thā. Maiñ Isrāīl ḡaum ke ḡabile Binyamīn kā hūñ, aisā Ibrānī jis ke wālidain bhī Ibrānī the. Maiñ Farīsiyoñ kā membar thā jo Yahūdī shariyat ke kaḡar pairokār haiñ. ⁶ Maiñ itnā sargarm thā ki Masīh kī jamātoñ ko īzā pahuñchāī. Hāñ, maiñ shariyat par amal karne meñ rāstbāz aur be'ilzām thā.

Haqīqī Fāydā

⁷ Us waḡt yih sab kuchh mere nazdīk nafā kā bāis thā, lekin ab maiñ ise Masīh meñ hone ke bāis nuḡsān hī samajhtā hūñ. ⁸ Hāñ, balki maiñ sab kuchh is azīmtarīn bāt ke sabab se nuḡsān samajhtā hūñ ki maiñ apne ḡhudāwand Masīh Īsā ko jāntā hūñ. Usī kī ḡhātir mujhe tamām chīzoñ kā nuḡsān pahuñchā hai. Maiñ unheñ kūrā hī samajhtā hūñ tāki Masīh ko hāsil karūñ ⁹ aur us meñ pāyā jāūñ. Lekin maiñ is naubat tak apnī us rāstbāzī ke zariye nahīñ pahuñch saktā jo shariyat ke tābe rahne se hāsil hotī hai. Is ke lie wuh rāstbāzī zarūrī hai jo Masīh par īmān lāne se miltī hai, jo Allāh kī taraf se hai aur jo īmān

par mabnī hotī hai. ¹⁰ Hān, main sab kuchh kūrā hī samajhtā hūn tāki Masīh ko, us ke jī uṭhne kī qudrat aur us ke dukhoñ meñ sharīk hone kā fazl jān lūñ. Yoñ main us kī maut kā hamshakl bantā jā rahā hūñ, ¹¹ is ummīd meñ ki main kisī na kisī tarah murdoñ meñ se jī uṭhne kī naubat tak pahuñchūngā.

Inām Hāsil Karne ke lie Dauren

¹² Matlab yih nahīn ki main yih sab kuchh hāsil kar chukā yā kāmīl ho chukā hūñ. Lekin main manzil-e-maqsūd kī taraf daurā huā jātā hūn tāki wuh kuchh pakar lūñ jis ke lie Masīh Īsā ne mujhe pakar liyā hai. ¹³ Bhāiyo, meñ apne bāre meñ yih kḥayāl nahīn kartā ki main ise hāsil kar chukā hūñ. Lekin main is ek hī bāt par dhyān detā hūñ, jo kuchh mere pīchhe hai wuh main bhūl kar saḥt tag-o-dau ke sāth us taraf baḥtā hūñ jo āge paḥā hai. ¹⁴ Main sīdhā manzil-e-maqsūd kī taraf daurā huā jātā hūn tāki wuh inām hāsil karūñ jis ke lie Allāh ne mujhe Masīh Īsā meñ āsmān par bulāyā hai.

Masīh meñ Puḥtā Honā

¹⁵ Chunāñche ham meñ se jitne kāmīl haiñ āeñ, ham aisī soch rakheñ. Aur agar āp kisī bāt meñ farq sochte haiñ to Allāh āp par yih bhī zāhir karegā. ¹⁶ Jo bhī ho, jis marhale tak ham pahuñch gae haiñ āeñ, ham us ke mutābiq zindagī guzāreñ.

¹⁷ Bhāiyo, mil kar mere naqsh-e-qadam par chaleñ. Aur un par kḥūb dhyān deñ jo hamāre namūne par chalte haiñ. ¹⁸ Kyonki jis tarah main

ne āp ko kāī bār batāyā hai aur ab ro ro kar batā rahā hūñ, bahut-se log apne chāl-chalan se zāhir karte haiñ ki wuh Masīh kī salīb ke dushman haiñ. ¹⁹ Aise logoñ kā anjām halākat hai. Khāne-pīne kī pābandiyāñ aur khatne par faḡhr un kā Ḳhudā ban gayā hai. * Hāñ, wuh sirf duniyāwī soch rakhte haiñ. ²⁰ Lekin ham āsmān ke shahrī haiñ, aur ham shiddat se is intazār meñ haiñ ki hamārā Najātdahindā aur Ḳhudāwand Īsā Masīh wahīñ se āe. ²¹ Us waqt wuh hamāre pashāl badanoñ ko badal kar apne jalālī badan ke hamshakl banā degā. Aur yih wuh us quwwat ke zariye karegā jis se wuh tamām chīzeñ apne tābe kar saktā hai.

4

Hidāyāt

¹ Chunāñche mere pyāre bhāiyo, jin kā ārzūmand maiñ hūñ aur jo merī musarrat kā bāis aur merā tāj haiñ, Ḳhudāwand meñ sābitqadam raheñ. Azīzo, ² maiñ Yuwadiyā aur Suntuḡhe se apīl kartā hūñ ki wuh Ḳhudāwand meñ ek jaisī soch rakheñ. ³ Hāñ mere hamḡhidmat bhāī, merī āp se guzārish hai ki āp un kī madad kareñ. Kyoñki wuh Allāh kī ḡhushḡhabrī phailāne kī jidd-o-jahd meñ mere sāth ḡhidmat kartī rahī haiñ, us muḡābale meñ jis meñ Klemens aur mere wuh bāqī madadgār bhī sharīk the jin ke nām kitāb-e-hayāt meñ darj haiñ.

* **3:19** Lafzī tarjumā: Un kā peḡ aur un kā apñī sharm par faḡhr un kā Ḳhudā ban gayā hai.

⁴ Har waqt Ḳhudāwand meñ ḳhushī manāēn. Ek bār phir kahtā hūn, ḳhushī manāēn.

⁵ Āp kī narmdilī tamām logoñ par zāhir ho. Yād rakheñ ki Ḳhudāwand āne ko hai. ⁶ Apnī kisi bhī fikr meñ ulajh kar pareshān na ho jāēn balki har hālat meñ duā aur iltijā karke apnī darḳhasteñ Allāh ke sāmne pesh kareñ. Dhyān rakheñ ki āp yih shukrguzārī kī rūh meñ kareñ. ⁷ Phir Allāh kī salāmatī jo samajh se bāhar hai āp ke diloñ aur ḳhayālāt ko Masīh Īsā meñ mahfūz rakhegī.

⁸ Bhāiyo, ek āḳhirī bāt, jo kuchh sachchā hai, jo kuchh sharīf hai, jo kuchh rāst hai, jo kuchh muḡaddas hai, jo kuchh pasandīdā hai, jo kuchh umdā hai, ḡharz, agar koī aḳhlāqī yā qābil-e-tārif bāt ho to us kā ḳhayāl rakheñ. ⁹ Jo kuchh āp ne mere wasīle se sīkh liyā, hāsil kar liyā, sun liyā yā dekh liyā hai us par amal kareñ. Phir salāmatī kā Ḳhudā āp ke sāth hogā.

Jamāt kī Mālī Imdād ke lie Shukriyā

¹⁰ Maiñ Ḳhudāwand meñ nihāyat hī ḳhush huā ki ab āḳhirkār āp kī mere lie fikrmandī dubārā jāg uṭhī hai. Hāñ, mujhe patā hai ki āp pahle bhī fikrmand the, lekin āp ko is kā izhār karne kā mauḡā nahīn milā thā. ¹¹ Maiñ yih apnī kisi zarūrat kī wajah se nahīn kah rahā, kyoñki maiñ ne har hālat meñ ḳhush rahne kā rāz sīkh liyā hai. ¹² Mujhe dabāe jāne kā tajrabā huā hai aur har chīz kasrat se muyassar hone kā bhī. Mujhe har hālat se ḳhūb wāqif kiyā gayā hai, ser hone se aur bhūkā rahne se bhī, har chīz kasrat se muyassar hone se aur zarūratmand hone se

bhī. ¹³ Masīh meñ main sab kuchh karne ke qābil hūñ, kyonki wuhī mujhe taqwiya detā rahtā hai.

¹⁴ To bhī achchhā thā ki āp merī musibat meñ sharīk hue. ¹⁵ Āp jo Filippī ke rahne wāle haiñ khud jānte haiñ ki us waqt jab Masīh kī munādī kā kām āp ke ilāqe meñ shurū huā thā aur main sūbā Makiduniyā se nikal āyā thā to sirf āp kī jamāt pūre hisāb-kitāb ke sāth paise de kar merī khidmat meñ sharīk huī. ¹⁶ Us waqt bhī jab main Thissalunike Shahr meñ thā āp ne kāī bār merī zarūriyāt pūrī karne ke lie kuchh bhej diyā. ¹⁷ Kahne kā matlab yih nahīn ki main āp se kuchh pānā chāhtā hūñ, balki merī shadīd khāhish yih hai ki āp ke dene se āp hī ko Allāh se kasrat kā sūd mil jāe. ¹⁸ Yihī merī rasīd hai. Main ne pūrī raqam wasūl pāī hai balki ab mere pās zarūrat se zyādā hai. Jab se mujhe Ipafruditus ke hāth āp kā hadiyā mil gayā hai mere pās bahut kuchh hai. Yih khushbūdār aur qābil-e-qabūl qurbānī Allāh ko pasandīdā hai. ¹⁹ Jawāb meñ merā Khudā apnī us jalālī daulat ke muwāfiq jo Masīh Īsā meñ hai āp kī tamām zarūriyāt pūrī kare. ²⁰ Allāh hamāre Bāp kā jalāl azal se abad tak ho. Āmīn.

Salām aur Barkat

²¹ Tamām maqāmī muqaddasīn ko Masīh Īsā meñ merā salām denā. Jo bhāī mere sāth haiñ wuh āp ko salām kahte haiñ. ²² Yahān ke tamām muqaddasīn āp ko salām kahte haiñ, khāskar shahanshāh ke gharāne ke bhāī aur bahneñ. ²³ Khudāwand Īsā Masīh kā fazl āp kī rūh ke sāth rahe. Āmīn.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-30

PDF generated using Haiola and XeLaTeX on 22 Feb 2024 from source files dated 13 Dec 2023

123ff8cb-27b3-5817-a02a-22e67145fd30